

понеж по апостольскому учению паче подобает повиноватися богови, неже человеком, мирьстии бо властели человеци суть: тело отняти могут, души же ни. Сего ради всемогущаго творца, створившаго тело и душу, имущаго власть тело вкупе с душою послати в геенну, паче всех бояться подобает || и церковь его всю мирьскую боязнь отложше бреши добре, правити и вещей ея отимати не попускати. л. 502

Зде же внимати, разумети^н подобает посреди прочих, понеже слово творим о святотатстве, что есть святотатство. По учителем убо святым насилствовати или отняти вещи церковные и насилствуяй и отимаяй стяжания церковная наричется святотатець. И бывает святотатство трема обычеи: первое отъемлюще священное от священнаго, второе отъемлюще несвященное от священнаго, третье отъемлюще священное от несвященнаго. Отъемляй бо вещь священную богови данную силно и противу заповеди от места священнаго сиречь^о от церкви или от инаго || места богови освященнаго, святотатство творит; такожде отъемляй вещь несвященную, сиречь злато или сребро или церковное скровище силно противу заповеди от места священнаго, сиречь от церкви или от иного места богови освященнаго, святотатство творить, и такожде отъемляй вещь священную богови данную силно и противу заповеди от места несвященнаго святотатство творить. И иже настоятеля и пастыря своего епископа обличающа о сих презреть, и ни в что же творить, и обличающаго вредить или словом или действием, и послушати не въсхоцеть ниже повиноватися, и святых отец уставы ничим творит, || и насилство лукавым духом водим съветующу дьяволу яже божиа и церкви его суть отъемлет и отимати не боится сугубо святотатство творить: первое еже святых отец уставов не приемлет и спротивление епископу здравому и святому наказанию творить, яже суть от святых сборныя церкви заповеданна, второе еже вещь живому богу освященную и даную насилством взял и съкровищу своему съвокупи. Сий грех святотатства понеже тяжек есть, каноны святые и священныя правила тяжце казнять. Казнь же святотатства по правилом некогда сребренная, некогда отлучение, анафема, || изъявная епитемия, и на конец живота не дасться ему церковное погребение, аще не покается сердцем съкрушенным и полно все церковное взятое настоятелю своему епископу цело отдасть събою или законными своими наследники или своими приказники. Понеж грех сий ни зде, ни в будущем не оставится, аще вещь божиа взятая не отдана будет церкви. Все человеци жизни сея объего полу всякого достоинства да внемлют сие великое укрепление и свободу церкви епископом и пастырем церкви христовы наместником и вещей ея предано быти, которое аще кто насилствовати покусится, тяжце мучим || будет душею и телом праведным божим судом в той день боязно есть, егда небеса подвигнутся и земля.^н л. 503 об.

Сие же укрепление и свободу от бога церкви его преданное образовано бе в Ветхом завете шестью грады левитскими на помощи беглецем отделеными, да прибегнуть в них пролияй кровь, яко пишется в Числех, глава 35, яко от тех градов священнических Ветхаго завета им преданных не бе леть убийцу извлеши и погубити к ним прибегшаго. Тако в Новом законе не попускается из дому и града божиа, сиречь от церкви или от инаго места богови данаго, стяжании отимати епископом и пастырем противящимся. Епископ же, иже насилником вещей || церковных постоянно противится, добрый пастырь есть не бояйся душу свою положить за овца своя. Аще ли убойтся противлятися или не радить противу глаголати или не въсхоцеть стяжаний церковных себе порученных защищати, яко

^н разумети *оставлено на поле.* ^о В ркп. сисечь. ^н В ркп. приписано на поле въстрепещет.